

**UCAPAN PERDANA MENTERI DI UPACARA MERASMIKAN BANGUNAN BARU KOMPLEKS KEWANGAN DI JALAN RAJA CHULAN, KUALA LUMPUR, PADA 2 JULAI, 1979.**

Yang Berhormat Encik Ghafar Baba, Pengerusi Kompleks Kewangan Malaysia Berhad, Yang Berhormat Menteri-Menteri dan Timbalan-Timbalan Menteri, Ahli-ahli Lembaga Pengarah dan Pegawai serta Kakitangan Kompleks Kewangan Malaysia Berhad, Dif-dif Kehormat, tuan-tuan dan puan-puan sekalian.

Majlis perasmian bangunan pada hari ini amatlah besar maknanya kepada Kompleks Kewangan Malaysia Berhad. Dengan mempunyai bangunannya sendiri tersergam maka dapatlah ia menempatkan semua anak-anak syarikatnya di bawah satu bumbung.

Saya mengucapkan tahniah kepada Kompleks Kewangan di atas kejayaannya ini. Saya juga mengucapkan berbanyak terima kasih serta setinggi-tinggi penghargaan kepada Lembaga Pengarah dan Pengurusan, terutama kepada Pengerusinya, Encik Ghafar Baba, kerana memberi penghormatan kepada saya merasmikan pembukaan bangunan ini.

Sebagaimana yang telah dinyatakan oleh Encik Ghafar tadi, bahawa Kompleks Kewangan ini telah ditubuhkan pada awal tahun 1973. Penuhannya telah meningkatkan lagi kegiatan pelabur-pelabur bumiputera dari semua lapisan masyarakat dengan melibatkan diri dengan secara tidak langsung di dalam syarikat-syarikat swasta. Keupayaannya ini membayangkan bahawa masyarakat bumiputera telah sedar betapa pentingnya mereka melibatkan diri dalam pelaburan-pelaburan syarikat swasta.

Dengan adanya sokongan seperti ini maka dapatlah Kompleks Kewangan dan anak-anak syarikatnya bergerak dengan lebih cergas dan berkesan lagi, menggembelinkan sumber-sumber kewangan kaum bumiputera. Penyertaan rakyat bumiputera, terutama dalam sektor ekonomi moden, perlulah ditingkatkan lagi supaya matlamat menyusun semula masyarakat sebagaimana yang ditetapkan di bawah Dasar Ekonomi Baru itu dapat dicapai sepenuhnya. Saya harap kaum bumiputera seluruhnya dapatlah meningkatkan lagi wang simpanan mereka dengan cara menyimpan di dalam institusi yang sedia ada atau melabur melalui institusi kewangan bumiputera seperti Kompleks Kewangan ini.

Tuan-tuan dan puan-puan sekalian,

Sejak pelancaran Dasar Ekonomi Baru, hampir sembilan tahun yang lalu, hakmilik modal saham kaum bumiputera termasuklah kepentingan bumiputera pada keseluruhannya, telah meningkat daripada \$280 juta dalam tahun 1971 kepada \$2,156 juta pada tahun 1978. Jumlah ini merupakan 10.3% daripada jumlah besar hakmilik modal yang terkumpul. Kejayaan ini belumlah lagi memuaskan, terutama jika diambil kira bahawa daripada jumlah 10.3% ini kaum bumiputera perseorangan hanya memiliki sebanyak 3.6% sahaja. Angka ini adalah terlalu kecil. Kita hanya mempunyai sebelas tahun lagi sebelum berakhirnya tempoh jangka yang ditetapkan untuk pelaksanaan Dasar Ekonomi Baru pada tahun 1990. Kita harus sedar bahawa kejayaan pelaksanaan Dasar ini bergantung antara lain, kepada keupayaan dan kebolehan kita meningkatkan lagi sumber kewangan kita, di samping mewujudkan, membangun dan menambahkan bilangan usahawan-usahawan bumiputera.

Dalam masa pelaksanaan Dasar Ekonomi Baru ini berbagai agensi Kerajaan dan berbagai bentuk institusi pelaburan telah ditubuhkan. Kesemuanya bertujuan membuka peluang kepada pelabur-pelabur bumiputera melabur sumber kewangan mereka bagi menjamin masa depan kaum bumiputera. Kemudahan yang disediakan oleh Kompleks Kewangan ini merupakan satu daripadanya. Tiap-tiap tabung Kumpulan Modal Bumiputera yang telah dilancarkan oleh Kompleks Kewangan ini di masa-masa yang lalu telah mendatangkan pulangan modal yang memuaskan. Dengan adanya galakan ini, maka pelancaran Tabung Kesepuluh Kumpulan Modal Bumiputera pada bulan Oktober tahun lalu, telah berjaya menggembeling sebanyak \$15.2 juta. Ini adalah \$5.2 juta lebih daripada yang dikehendaki. Pelabur-pelabur bumiputera kini telah mula menghargai aktiviti pelaburan seperti yang disediakan oleh Kompleks Kewangan ini.

Kebanyakan agensi Kerajaan dan institusi pelaburan yang ditubuhkan bagi membantu pelaksanaan Dasar Ekonomi Baru, telah mengalami berbagai cabaran dan dugaan. Ada yang telah dapat mengatasi segala-galanya dan mencapai kejayaan yang amat menggalakkan. Oleh kerana mereka ini ditubuhkan sebagai pemegang amanah kaum bumiputera, maka sudah sampailah masanya pertimbangan diberikan supaya sebilangan perusahaan-perusahaan yang menguntungkan yang dikendalikan oleh agensi-agensi ini, dipindah milik kepada kaum bumiputera yang berkebolehan dan berkeupayaan.

Agensi-agensi Kerajaan hendaklah sedar bahawa sebagai pemegang-pemegang amanah kepada kaum bumiputera, mereka adalah bertang-

gungjawab bagi memupuk dan membimbing serta memajukan lagi peng-  
usaha-pengusaha bumiputera, di samping mewujudkan usahawan-usaha-  
wan bumiputera yang baru. Mereka tidak harus wujud persaingan di-  
antara satu sama lain, lebih-lebih lagi persaingan dengan kegiatan yang  
dijalankan oleh pengusaha-pengusaha bumiputera secara individu. Me-  
reka mestilah bekerjasama serta menyelaraskan kegiatan-kegiatan me-  
reka supaya keupayaan dan kemampuan melabur modal di kalangan  
kaum bumiputera dapat ditingkatkan lagi. Peranan agensi-agensi ini  
hendaklah sebagai penggerak dan pemegang amanah. Di mana-mana  
yang sesuai dan menasabah mereka patutlah memberi perlindungan ke-  
pada kaum bumiputera yang memerlukannya. Kepada kaum bumi-  
putera seluruhnya, saya berharap mereka akan terus mengambil peluang  
ini untuk memperbaiki diri sendiri demi menjamin kepentingan dan  
masa depan kaumnya sendiri.

Tuan-tuan dan puan-puan sekalian,

Kemudahan-kemudahan yang disediakan oleh institusi kewangan se-  
perti Kompleks Kewangan ini antara lain, membolehkan kaum bumi-  
putera menikmati keuntungan melalui berbagai bentuk pelaburan. Saya  
difahamkan bahawa kompleks ini menerusi Pelaburan Amanah Nasional  
Berhadnya, yang kini mempunyai pengurusan pelaburan profesyenal,  
akan melancarkan rancangan baru yang akan memberi peluang kepada  
kaum bumiputera melabur di dalam saham-saham syarikat-syarikat yang  
tertentu. Sekim seperti ini merupakan satu cara bagaimana pelabur-pe-  
labur bumiputera boleh menikmati keuntungan dalam pelaburan saham-  
saham syarikat dan pelaburan harta dengan cara membeli saham-saham  
yang dikeluarkan oleh syarikat Amanah Saham itu sendiri.

Di samping itu, menerusi anak-anak syarikat yang lain Kompleks Ke-  
wangan ini juga menyediakan kemudahan-kemudahan pelaburan lain se-  
perti kemudahan pasaran wang jangka pendek, perkhidmatan Bank  
Saudagar, perkhidmatan pinjaman, perkhidmatan broker wang dan  
mata wang asing, broker insuran dan perkhidmatan syarikat peminjam.  
Melalui Komplek ini juga segolongan bumiputera yang mahir dalam  
bidang pasaran saham telah dapat diwujudkan. Mereka ini kini sedang  
berkhidmat dengan agensi-agensi atau institusi-institusi kewangan yang  
lain. Sumbangan Kompleks Kewangan ini dalam bidang kemahiran pasa-  
ran saham sangatlah membanggakan.

Saya amat menghargai serta menjunjung tinggi pengakuan yang telah  
dilafazkan oleh Encik Ghafar tadi bahawa Kompleks Kewangan ini akan

sentiasa bekerja keras menunaikan tugas dan tanggungjawabnya. Sesungguhnya amanah dan kejujuran hendaklah menjadi mutu kelayakan utama sifat dan sikap setiap ahli lembaga pengarah dan kakitangan pengurusan dalam sebarang institusi kewangan, terutama badan-badan yang telah diamanahkan oleh rakyat. Pada setiap masa, mereka mestilah mengutamakan kepentingan rakyat lebih daripada kepentingan diri sendiri. Sifat-sifat mulia dan terpuji ini akan dapat mengukuhkan lagi kepercayaan rakyat kepada sesebuah institusi.

Memandangkan kepada perkembangan dalam beberapa tahun yang akhir ini, saya mengingatkan setiap pegawai dan kakitangan yang bertugas dengan institusi-institusi yang menjaga kepentingan ekonomi orang-orang Melayu dan bumiputera supaya mengukuhkan lagi semangat keimanan dan kesetiaan. Mereka hendaklah sentiasa bersedia untuk berkhidmat dan berbakti secara jujur dan ikhlas. Inilah sebaik-baik sumbangan bagi menjamin kedudukan ekonomi bangsa dan negara yang kukuh. Kesilapan, kepincangan dan kelemahan yang telah berlaku pada masa-masa yang lalu hendaklah dijadikan contoh tauladan yang baik. Janganlah hendaknya kita menyalahgunakan kebijaksanaan dan kepakaran kita untuk kepentingan diri. Kita mestilah menjunjung tinggi amanah dan kepercayaan rakyat yang memerlukan kepimpinan yang bijak dan jujur daripada pihak pengarah dan pengurusan.

Berbalik kita kepada majlis perasmian ini, saya sukacita menyatakan bahawa keputusan Kompleks Kewangan melabur semula keuntungannya dalam bentuk harta tetap adalah satu langkah yang baik. Saya percaya Kompleks Kewangan ini akan dapat menggunakan kemudahan baru ini untuk memesatkan lagi usaha dan kegiatannya dan anak-anak syarikatnya di masa-masa akan datang. Saya mendoakan selamat maju-jaya. Saya juga mendoakan semoga Allah sentiasa memberi perlindungan kepada setiap orang yang menggunakan bangunan ini serta menjayakan semua syarikat dan perusahaan yang berlandung di dalamnya.

Tuan-tuan dan puan-puan sekalian,

Dengan ini, saya dengan nama Allah yang amat pemurah lagi amat mengasihani, merasmikan pembukaan Bangunan Kompleks Kewangan Malaysia Berhad.

Terima kasih.